



Sesida dals

24 da favrer 2026

Communitgà ils

26 da favrer 2026

Protocol nr.

142/2026

Dumonda da la fracziun dal Center

concernent la distgargia da la classa mesauna tar las premias da las cassas da malsauns (emprim sutsegnader Collenberg)

Resposta da la Regenza

Tar la dumonda 1: La reducziun da las premias vegn calculada en il chantun Grischun sin basa da las entradas imputablas. Per calcular las entradas imputablas vegni partì da las entradas suttamessas a la taglia, ch'èn decisivas per fixar la tariffa, plus diversas posiziuns da la taxaziun da taglia. Las premias da la cassa da malsauns vegnan reducidas, sch'ellas surpassan ina resalva persunala ch'è graduada tenor categorias d'entrada. Persunas ch'èn suttamessas comunablamain a la taglia han in dretg cumplain d'ina reducziun da las premias. Actualmain vegni votà sin plaun federal davart il project per ina imposiziun da taglia individuala. Sche quest project vegn acceptà, ha quai er consequenzas per la calculaziun da la reducziun da las premias sin plaun chantunal.

L'Uffizi federal da sanadad publica (UFSP) ha laschà examinar pliras giadas l'efficacità da la reducziun da las premias. L'ultim rapport è vegnì publitgà il matg 2022. Da quel resorta, ch'il chantun Grischun occupa areguard l'effectività la segund meglra piazza da tut ils chantuns. Per questa controlla da l'efficacità vegn eruida la premia da set chasadas da model, che resta suenter la deducziun da la RIP. Silsuenter vegn questa premia messa en relaziun cun las entradas che stattan a disposiziun.

Sche l'imposiziun da taglia individuala avess da vegnir introducida, stuess probabla-main vegnir examinà l'entir sistem da la reducziun da las premias en il chantun Grischun. E perquai ch'il chantun fa ina fitg buna figura tenor il rapport davart l'efficacità da la reducziun da las premias, è la Regenza da l'avis, ch'i n'è actualmain betg raschunaivel d'elavurar in ulteriur rapport.

Tar la dumonda 2: La Regenza ha auzà per il 1. da schaner 2026 ils supplements da famiglia sin 240 francs (supplement per uffants) e 290 francs (supplement per

scolaziun). Cun quai ha il chantun Grischun auzà las tariffas minimalas per ils supplements da famiglia per la segunda giada dapi l'onn 2023 per mintgamai 10 francs per persuna cun dretg da supplements. Ils ultims onns ha la Regenza duvrà las libertads d'agir per auzar ils supplements ed a medem temp reducir las tariffas da contribuziun. Cun l'import actual dals supplements è il chantun Grischun en la cumparegliaziun interchantunala sin in rang entaifer l'emprim terz. A curta vista fissi supportabel d'auzar anc ina giada ils supplements, a media vista stuessan dentant puspè vegnir auzadas las tariffas da contribuziun. Suentar l'ultima revisiun sto in tal pass vegnir evità. Per il mument refusa la Regenza perquai d'auzar in'ulteriura giada ils supplements da famiglia.

Tar la dumonda 3: La Regenza è da l'avis, che – per chattar soluziuns – saja meglier, sche las cumpetenzas per fixar las premissas da contribuziun sco er l'import da la reducziun da las premias restian vinavant tar ils chantuns. Il rapport dal UFSP menziunà qua survart mussa, ch'il concept dal chantun Grischun en connex cun la reducziun da las premias è fitg bun ed effectiv. En il rom da las lavurs da la Conferenza da las directuras e dals directurs chantunals da sanadad (CDS) s'engascha il chantun Grischun, per che la reducziun da las premias restia vinavant en la cumpetenzza dals chantuns e ch'il chantun possia uschia mantegnair sias libertads d'agir en quest sector.



Il president:

Martin Bühler

En num da la Regenza

Il cancellier:

Daniel Spadin